

- c. Ef leyfishafi deyr, heldur ekkja hans leyfinu, enda séu óskir hennar til þess fyrir hendi og leyfishafi meðlimur Bifreiðastjórafélagsins Faxe.

13. gr.

Vilji leyfishafi öðlast undanþágu samkvæmt 12. gr., skal hann sækja um það skriflega til Bifreiðastjórafélagsins Faxe. Umsókninni skal fylgja vottorð frá bifreiðastöð leyfishafa um, að hún samþykki þann ökumann er leyfishafi vill að aki bifreiðinni.

Bifreiðastjórafélaginu er þá heimilt að veita undanþáguna og skal hún vera skrifleg og tímabundin og tekið skal fram, hvað í henni felst. Er viðkomandi bifreiðastjóra skylt að bera slíka undanþágu á sér er hann er við akstur og sýna hana trúnaðarmönnum félagsins, ef þeir óska þess.

Bifreiðastjórafélagið skal halda skrá um veittar undanþágur samkvæmt framan-sögðu.

14. gr.

Hverri bifreiðastöð er skylt að láta úthlutunarmönnum í té, í septembermánuði ár hvert, skrá yfir allar þær bifreiðar, er hafa þar afgreiðslu. Í skrá þeirri skal tilgreina skrásetningarnúmer bifreiðar, nafn bifreiðastjóra og bifreiðaeiganda.

15. gr.

Úthlutunarmönnum er heimilt að afturkalla atvinnuleyfi um stundarsakir, ef leyfishafi brýtur ákvæði reglugerðar þessarar, eða fyrir fullt og allt, ef um alvarleg og ítrekuð brot er að ræða. Slíkum úrskurðum má þó áfrýja til samgöngumálaráðuneytisins.

Reglugerð þessi, sem sett er samkvæmt lögum nr. 1 31. janúar 1966, um leigu-bifreiðar, staðfestist hér með til að öðlast þegar gildi og birtist til eftirbreytni öllum þeim, sem hlut eiga að máli.

Samgöngumálaráðuneytið, 11. maí 1967.

Ingólfur Jónsson.

Kristinn Gunnarsson.

S A M Þ Y K K T

fyrir Landþurrkunar- og áveitufélag Hjaltastaðahrepps.

1. gr.

Félagið heitir Landþurrkunar- og áveitufélag Hjaltastaðahrepps. Heimili þess og varnarþing er Hjaltastaðahreppur í N.-Múlasýslu.

2. gr.

Félagssvæðið nær yfir eftirtaldar jarðir í Hjaltastaðahreppi: Heyskálar, Gagnstöð, Klúka, Engilækur, Sandur, Eyland, Hólshjáleiga, Hóll, Ásgrímsstaðir, Hrollaugstaðir, Bóndastaðir, Grænahlíð, Hjaltastaður I, Hjaltastaður II, Jórvík, Jórvíkurhjáleiga, Sigtún, Kóreksstaðir, Kóreksstaðagerði, Dalir og Sandbrekka.

Á fundum í félaginu gildir eitt atkvæði fyrir hvert lögbýli.

3. gr.

Tilgangur félagsins er að bæta engjalönd þeirra jarða, sem taldar eru í 2. gr., með framræslu, byggingu flóðgátta og flóðgarða ef henta þykir, og á hvern annan tiltækan hátt er miðar að því að gera þessi lönd uppskerumeiri en nú er.

4. gr.

Félaginu stjórnar þriggja manna stjórn, kosin á aðalfundi þess til þriggja ára. Ganga tveir menn úr stjórn félagsins á ári tvö fyrstu árin eftir hlutkesti, þriðja árið gengur sá úr stjórn, sem eftir er, og síðan ganga menn úr stjórn eftir starfsaldri ár hvert.

Stjórnarnefndarmenn má endurkjósa, en enginn er skyldur að taka við endurkosningu fyrr en eftir jafnlangan tíma og hann hefur áður starfað í stjórninni.

Stjórnin skiptir sjálf með sér verkum. Hún annast allar framkvæmdir félagsins og störf þess milli aðalfunda samkvæmt ákvörðun aðalfundar.

Stjórninni er heimilt að ráða árlega einn mann sér til aðstoðar, til þess að hafa verkstjórn á framkvæmdum og umsjón með öllum framkvæmdum félagsins, og skal hann í starfi sínu hlíta fyrir mælum stjórnar samkvæmt erindisbréfi er hún gefur honum, er felur í sér reglur um gerð mannvirkjana og alla tilhögun.

Í desembermánuði ár hvert jafnar stjórnin niður öllum kostnaði samkv. 6. gr. Greiðslur fyrir störf sín fær stjórnin eftir reikningi er samþykktur skal af aðalfundi.

5. gr.

Aðalfund sinn heldur félagið fyrir lok aprilmánaðar ár hvert. Til hans skal boðað með minnst viku fyrirvara með símtali eða á sannanlegan hátt. Aðalfundur er löglegur ef löglega er til hans boðað. Á aðalfundi leggur stjórnin fram endurskoðaða reikninga félagsins. Þar er kosin stjórn og endurskoðendur, og teknar ákvarðanir um þau mál er félagsstarfið varðar. Stjórnin skal leitast við að fá Búnaðarsamband Austurlands og Búnaðarfélag Íslands til að gera kostnaðaráætlanir um fyrirhugaðar framkvæmdir og leggja þær fyrir fundi í félaginu ef kostur er. Aukafundi skal halda þegar félagsstjórn, eða helmingur félagsmanna álitur þess þörf.

6. gr.

Í lok hvers árs skiptir stjórnin niður öllum áföllnum kostnaði á því ári, þannig:

1. Gröftur markaskurða skiptist að jöfnu milli aðliggjandi jarða.
2. Sérhverju býli reiknast allur skurðgröftur á þess landi. Nú liggur skurður í gegnum lönd tveggja eða fleiri jarða og þarf þess vegna að hafa meira en venjulegt rými á neðri hlutanum, skal þá jafna mismuninum á þær jarðir, er ofar liggja.
3. Flóðgarðar reiknast viðkomandi jörð.
4. Kostnaður af flóðgörðum, stíflugörðum og flóðgáttum, sem er sameiginlegur fyrir tvær eða fleiri jarðir, skiptist eftir flatarmáli áveitulands.
5. Viðhaldskostnaður þeirra mannvirkja, sem talin eru undir tölulíð 1 og 4, greiðist á sama hátt og stofnkostnaðurinn.
6. Allur annar kostnaður, svo sem vaxtagreiðslur af lánnum vegna stofn- eða viðhaldskostnaðar og kostnaðar við eftirlit og stjórn félagsins, skiptist hlutfallslega eftir heildar framkvæmdum jarðanna.

7. gr.

Stjórninni er heimilt eftir ákvörðun aðalfundar að taka stofnkostnaðarlán. Skuldbindingar félagsins ábyrgjast félagsmenn einn fyrir alla og allir fyrir einn.

8. gr.

Rísi ágreiningur milli félagsmanna innbyrðis eða milli félagsmanna og stjórnar, sker gerðardómur úr, er sé þannig skipaður að hvor málsaðili tilnefnir sinn manninn hvor og landbúnaðarráðherra oddamann.

9. gr.

Með brot á samþykkt þessari skal farið að hætti opinberra mála, og geta þau varðað sektum frá 500—5000 kr., ef eigi liggur þyngri hegning við að lögum. Sektir renna í sjóð félagsins.

10. gr.

Samþykktum þessum má breyta á lögmatum aðalfundi ef $\frac{2}{3}$ fundarmanna samþykkja breytinguna, og sé í fundarboði skýrt frá að breytingin komi fram á fundinum, enda komi staðfesting landbúnaðarráðuneytisins til.

11. gr.

Félagsskap þessum má því aðeins slíta, að eigi verði hægt að ná takmarki því, er félagið hefur sett sér, eða þeir örðugleikar reynist á, að ókleift eða illkleift þyki að halda félagsskapnum áfram.

12. gr.

Að öðru leyti en því er þessi samþykkt nær til er félagið háð ákvæðum vatnalaga frá 20. júní 1923.

Samþykkt þessi staðfestist hér með samkvæmt vatnalögum, nr. 15 20. júní 1923, til þess að öðlast þegar gildi og birtist til eftirbreytni öllum þeim, sem hlut eiga að máli.

Landbúnaðarráðuneytið, 9. maí 1967.

Ingólfur Jónsson.

Þorv. K. Þorsteinsson.

REGLUGERÐ

**um breyting á reglugerð um kjarasamninga starfsmanna sveitarfélaga, nr. 159
20. sept. 1962.**

Ákvæði til bráðabirgða:

Varðandi kjarasamninga starfsmanna sveitarfélaga, er taka gildi 1. janúar 1968, eru um málsmeðferð gerðar þessar breytingar á reglugerð nr. 159/1962.

1. Uppsagnarfræstur kjarasamninga samkvæmt 7. gr. framlengist til 1. september 1967.
2. Fræstur sáttasemjara ríkisins samkvæmt 2. mgr. 11. gr. til að taka kjaradeilu til meðferðar framlengist til 1. október 1967.
3. Fræstur aðila samkvæmt 1. mgr. 13. gr. til að senda Kjaradómi greinargerðir framlengist til 1. nóvember 1967.